

կետից, որովհետև բացառված չէ, որ այդ տարիների ընթացքում դուրս եկած և նոր ավելացած ձեռագրերի քանակը զուգահեռակերպ:

Է. [Մեքուպ Տեր-Մովսիսյան (Մագիստրոս), Յուցակ Տաթևի վանքի ձեռագիրների, Տաթև, 1904]: Այս ցուցակի ուր գտնվելն առայժմ պարզ չէ: Ցուցակի գոյություն և նկարագրված ձեռագրերի քանակի մասին իմանում ենք Մաշտոցյան Մատենադարանում պահվող Մ. Մագիստրոսի ձեռքով կատարված մի նշումից, որ ասված է. «Տաթևի 99-ի մանրամասն ցուցակը կազմեցի 1904 թ. յուլիսի 22-օգոստոսի 11-ը»<sup>11</sup>: Թե ինչ է ներկայացնում այս ցուցակն իրենից, չգիտենք: Բայց ամենայն հավանականությամբ, ինչպես հենց հեղինակն է շեշտում, կազմված բոլոր ցուցակների մեջ այն ամենամանրամասն է եղել, քանի որ Մ. Մագիստրոսը տվյալներ էր հավաքում իր հայերեն ձեռագրերի լիակատար ցուցակի համար:

Ը. Խորեն Մուրադբեկյան, Յուցակ Տաթևի վանքի ձեռագիրների, Տաթև, 1910<sup>12</sup>: Սույն ցուցակը կազմված է 1910 թվականի օգոստոսի 5—6-ը՝ Երևանի թեմի փոխ-թեմակալ Խորեն վրդ. Մուրադբեկյանի և Երևանի կոնսիստորիայի անդամ Անդրանիկ քահանայի ձեռքով: Ցուցակում ձեռագրերը եթե համարակալված են 1—92, իրականում, սակայն, նկարագրված միավորների թիվը հավասար է 143-ի, որովհետև մի շարք թվահամարների ներքո «ա, բ, գ»-ով նշված են նույն բովանդակությամբ մեկից ավելի ձեռագրեր, այսպես. № 28-ի տակ նշված է 4 Հարցմանց գիրք (+3), № 43-ի տակ՝ 2 Ճառերտիր (+1), № 44-ի տակ՝ 11 Յայամաուրք (+10), № 47-ի տակ՝ 22 Աւետարան (+21) և № 48-ի տակ՝ 2 Նարեկ (+1): Ցուցակում արձանագրված 143 միավորներից մեկը (№ 82) եղել է ինչ-որ տպագիր քերականական ձեռնարկ, իսկ մնացած 142-ը՝ ձեռագիր մատյաններ: Այս ցուցակն էլ, նախորդների նման, մատենագիտական որևէ տվյալ չի հաղորդում և սահմանափակվում է միայն ձեռագրերի խորագրերը նշելով:

Այսպիսով, տարբեր ժամանակներում և տարբեր անձանց կողմից կազմված վերոհիշյալ ցուցակներում Տաթևի ձեռագրերի քանակը ցույց է տրված.

1863 թ. . . . .	187
1864—1865 թթ. . . . .	(61+78) 139
1866 թ. . . . .	(13+78) 91
1868 թ. . . . .	91
1893 թ. . . . .	73
1899 թ. . . . .	(107+9+64+?) 187
1904 թ. . . . .	99
1910 թ. . . . .	142

**Արդ, ի՞նչ եղան արդ ձեռագրերը:**

Տաթևի գրատան ձեռագրերը դեռևս 1910 թվականին Երևանի թեմի փոխ-թեմակալ Խորեն վրդ. Մուրադբեկյանի և Երևանի կոնսիստորիայի անդամ Անդրանիկ քահանայի ձեռքով ցուցակագրվելուց անմիջապես հետո տեղափոխվել են էջմիածին և մուծվել էջմիածնի նախկին գրատան հավաքածուի մեջ, իսկ

11 Մատենադարան, Անտիպ ձեռագրացուցակների հավաքածու, գործ Մ. Մագիստրոսի, № 7: 12 Անդ, № 21: